

समा - 12:25 hrs.

CM Situation

मुख्यमंत्री उमर अब्दुल्ला होरें जम्मू-कश्मीर च लगातार बरखें करी पैदा होए दे हालात दा जायजा लैने लेई अज्ज इक उच्ची-सतह दी बैठक दी प्रधानता कीती। उनें सरबंध्यत अधिकारिएं गी निर्देश दित्ते जे ओहू जमीनी सतह उपपर अपनी हाजिरी जकीनी बनाने दे कन्नो-कन्नी बक्ख-बक्ख इलाकें च भरोचे दे पानी गी कडुने जरूरी सेवाएं दे संचालन ते प्रभावत इलाकें च बसनीकें गी सुरक्षित बचाइयै कडुने सने राहत अभियानें च बी तेजी आहनन। मंत्री जावेद राणा ते सतीश शर्मा होरें मुख्यमंत्री होरें गी जम्मू च बने दे हालात जिसलै के मंत्री सकीना इत्तू ते सलाहकार नासिर असलम वाणी होरें कश्मीर दे हालात बारै जानकारी दित्ती। मुख्यमंत्री होरें लोकें गी गुजारिश कीती ऐ जे ओहू सरकार आसेआ जारी निर्देशें दी पालमा करन ते खतरे दी शेंका आहले इलाकें च नेई जान।

<><><><><><>

Sundarbani Rains

जम्मू-कश्मीर च लगातार भारी बरखा नै बड़ी तबाही मचाई ऐ। रजौरी जिले दे सुंदरबनी इलाके च भारी बरखा करी इक घरै दी कंध ढट्टी गई जेह्दे कारण इक महिला ते ओह्दी बेटी दी मौत होई गई। उपमुख्यमंत्री सुरिंदर चौधरी होरें इस हादसे पर दुक्ख बुज्जदे होई सोगी परोआर प्रति हमदर्दी जताई ऐ।

<><><><><><>

Train Service

खराब मौसम करी जम्मू-कश्मीर च फसे दे यात्रिएं दी सुविधा लेई प्रदेश च रेल सेवा फही शुरु करी दित्ती गई ऐ। उत्तर रेलवे नै जम्मू ते श्री माता वैष्णो देवी कटरा बश्कार बी रेल सेवा परतियै शुरु करी दित्ती दी ऐ। एह्दे अलावा लम्मे पैंडे आहली रेलगड्डिएं जिआं जम्मू थमां कोलकाता ते कटरा थमां नमीं दिल्ली आहली रेल सेवा गी बी ब्हाल करी दित्ता गेआ ऐ। तोआई औंदी 6 सितम्बर थमां स्वराज ग्रुप दिआं 4 रेलगड्डियां बी फही चलना शुरु करी देडन। एह्दे परैन्त 7 सितम्बर गी जम्मू थमां अजमेर ते कटरा थमां नमीं दिल्ली लेई रेल चलाई जाह्ग। इसै चाल्ली औंदी 8 सितम्बर गी बी बक्ख-बक्ख रेलगड्डिएं दा संचालन कीता जाह्ग। जात्तरिएं गी सलाह दित्ती गई ऐ जे ओहू ताजा जानकारी लेई एन.टी.ई.एस ऐप्प पर जां फही 139 हेल्पलाईन नम्बर पर राबता करन।

<><><><><><>

Weather

जम्मू दे बक्ख-बक्ख हिस्सें च जंदे रोज थमां लगातार बरा करदी भारी बरखा दे चलदे केई इलाकें च पानी भरोचने, ट्रैफिक जाम लग्गने ते औने-जाने आलें गी परेशानियां पेश औने दियां खबरां हासल होआ करदियां न। मौसम विभाग नै जम्मू-कठुआ-रियासी-उधमपुर-डोडा-राजौरी ते रामबन जिले च अज्ज दपैही मगरा तोहड़ी भारी थमां बड़ी भारी बरखा दे आसार जताए दे न। मौसम विभाग नै पीर-पंजाल दे बी केई इलाकें च दर्मेयाने दर्जे थमां भारी बरखा बरने दी पेशगोई कीती ऐ। लोकें गी सलाह दित्ती गई ऐ जे ओ सौहगे सतर्क रौहन ते गैर जरूरी यात्राएं गी टाली देन ते एहतियाती हीलें दे तौरा पर मुकामी प्रशासन आसेया जारी दिशा-निर्देशें दी पालमा करन।

<><><><><><>

Traffic

जम्मू-श्रीनगर राष्ट्रीय जरनैली सिडकै पर गड्डियें दी आओ-जाई अज्ज बी बंद ऐ। केई सारी थाहरें पर जिमी धस्सने ते लास-पस्सियां पौने दे चलदे लोकें दी सुरक्षा गी दिक्खदे होई ए फैसला लैता गेदा ऐ। ध्यानजोग ऐ जे जम्मू-श्रीनगर जरनैली सिडकै गी 6 दिन बंद रौहने मगरा जंदे संगारे अद्दे-दुब्बे तौरा पर ब्हाल कीता गया ह। तोंआई मौसम दे खराब सूरतेहाल दे मद्देनजर जम्मू-कश्मीर च अज्ज बी सब्भनं सरकारी ते निजी शिक्षा इदारें गी बंद रक्खेया गेदा ऐ। अज्ज लैते जाने तय होए दे सब्भनं स्तेहानें गी बी अगड़ा पाई दिता गया ऐ।

<><><><><><>

4th Bridge Closed

जम्मू च लगातार बरा रदी भारी बरखा दे मद्देनजर जम्मू दे डिविजनल कमीशनर रमेश कुमार होरें तबी नदी पर बनाए गेदे चौथे पुल ते एदे कन्नै लगदी सिडक गी बंद करने दा हुकम जारी कीता ऐ। लोकें गी सलाह दिती गेई ऐ जे ओ होटल एशिया, सतवारी चौक ते भगवती नगर आली बक्खी दा मेजर सोमनाथ चौक ते चौथे पुलै बक्खी सफर नेंई करना। एहदे अलावा ल्हास-पस्सियां ते कुप्पड पौने करी पंजतीर्थी च अटल चौक थमां सिद्धडा पुलै तोड़ी दी सिडक बी गड्डियें दी आओ-जाई लेई बंद ऐ। सरबंघित अधिकारियें आम लोकें गी गुजारिश कीती ऐ जे ओ जारी दिशा-निर्देशें दी पालमा करन ते अपनी सुरक्षा लेई गैर-जरूरी यात्रां फिलहाल टाली देन।



Taxpayers Helpline

जम्मू-कश्मीर दे स्टेट टैक्स विभाग नै करदाताएं गी ई-वे बिल कन्नै सरबंघित मामलें च मदाद उपलब्ध करोआने लेई समर्पित हैल्पलाईन नम्बर जारी कीते ना। ए हैल्पलाईनां बिल तैयार करने च औने आलियें त्रुटियें ते बवस्था च औने आलियें रुकावटें गी दूर करने दे कन्नो-कन्नी औपचारिकतां पूरी करने च बी मदद करडन। पेशेवर-माहिरें आसेआ इनें हैल्पलाईनें दे राएं सरकारी कम्मकाज आले समें दरान करदाताएं दियें समस्याएं दे नबेडे करोआए जाडन। जम्मू जिले दे करदाता एकडे टेलिफोन नम्बरें पर सहायता हासल करी सकदे ना। नम्बर इस चाल्ली न-94191-57257 ते 70069-63445 इस पैहलकदमी दा मकसद जीएसटी सरबंघी प्रणाली दे बवस्थित कम्मै-काजे गी यकीनी बनाना ते करदाताएं दियें समस्याएं दा बेल्लै सिर नबेडा करोआना ऐ।



PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

